

Ich ha e grossi Wuert en mer vom Chopf bes zo de Füscht
well du hesch mech Ueli Achermaa als Gmeindamme schwer entüschd
du hesch mer of die Fasnacht he ned eis Sujet offeriert
also eis das chader säge em Hueber wär das ned passiert

Zersch hets Dach vom Schuelhus gseicht oh herjemineh
drofabe em letschte Johr das vom Zentrom Lee
damet mer e paar Johre ned weder es Leck müend sechte
wörd ich grad vo vornherein bem Altersheim ofs Dach verzechte

S`letschte Johr er glaubeds ned do gheyt mer de Lade abe
woni ghört ha das `si em lbärg hend en alti Ruine usgrave
jetz hämmer scho e Ruine dert hend ond kein Schwein seit en Satz
ond mer send äxtra no eini go boue obe of em Schuelhusplatz

Näbem Lüthi du do chömmer gli no en 2. Dokter verbueche
nor esch das den en Veterinär wo Tier duet ondersueche
doch zo wellem Dokter gang ich den s`duet mi fasch ächli irritiere
wenn ich nach der Fasnacht of em Hond be ond de Kater muess uskuriere

He was machsch do hani min Nochber gfrogt ond be ganz irritiert
wo de si Frau ond Chender födleblott en Dachständer ufe bugsiert
jetz fahr er met sim Auto ed Wöschalag nänei er düeg de ned öppe spenne
aber be eusem neue Wasserzeys do legi s`Dusche dehei nömm denne

Woni chörzlech met mim Hond zo sim Stammbaum be gloffe
do hani sone vornehme Snob os de Brogger Altstadt atrofte
de luegt zersch mech a den min Hond ond den de Baum die Eiche
ond seit mer z`Brogg mer händ halt Chlötz wo d`Hönd chönnd aneseich

Ich weiss liebe Gmeirot er händs guet gmeint ond eigentlech sett`me euch lobe
das er die 2 Bäumlü händ setze lo do em Hersche obe
nor müend die jetz leider weder ewäg das chani garantiere
well die z`Aarau obe jo neuerdengs kei bruni Stämm meh akzeptiere

Remige Brogg Zentrom Lee en Autofahrer dreyht set Stonde
Remige Brogg Zentrom Lee e eusem Chreisel sini Ronde
Remige Brogg Zentrom Lee ond den schloht er Krach
jo wenn chonnt jetz ändli gottfredstotz de Wägwieser nach Röfenach

Chum beni weder of freyem Fues ich ha gmeint mech chönn nüt me schocke
do duet mer em Hersche obe d`Schmier doch schoweder e Buess abzocke
sie mer händ grad ghört wesi gforzet händ ond leider mer düend ned spote
send of dem Areal set de Versteigerig jegliche Aktivitäte verbote

Wosi zwösche Cherchacker ond Broggerwald d`lezohnig vor düend neh
do hani dänkt das werd secher einisch det en super Oeberbouig geh
aber so wenn ich das jetze gseh do bruchi kei Brölle vom Blösser
do wärde jo nor vo de Schrebergärte d`Höttli ächli grösser

Also du wenn ich euse Gmeirot wär denn müesst ich ned lang überlegge
ond wörd de Bach vom Schüüracher ond grad bes es Chrändel ue freylegge
denn gheyt es bezeli Beton dry au es Kabel wörd no drie gworget
jo ond denn denn miechi de Bach weder zue ond d`Starchstromleitig wär versorget

Euse Dametornverein hört uf wäge Metglederschwond s`esch trurig
Au s`Steigers höre uf of der Tannegg ond das das magmi schurig
Es hört uf als Gmeirot de Märki Ernst ond au Schuelpflegsmetglieder
Nor eine de hört leider noni uf ich der Komedi chomm s`nächscht Johr weder

25 Jahr Komedi the very best of

Wänd er me bsueche? Ich be dehei onder „www.komedi.ch“